



## HINI nga ISYU

- ★ RONDA HAN NPA HA NORTE-SAMAR
- ★ AN KRISIS HA EKONOMIYA NGAN AN REHIMEN NGA ESTRADA

## EDITORIAL

### WARAY MALALAUMAN HA REHIMEN NGA ESTRADA

An rehimen nga Estrada waray bataan nga pagkakaiba ha rehimen nga Ramos. Pareho hira niyutiyu nga rehimen, reaksyunaryo ngan dako nga kumprador-dako nga agaron maytuna. Nagdodominar ha kampo ni Estrada an mga reaksyunaryo nga tagasunod han hadto anay diktador Marcos. Nangaro an kampo ni Estrada ngan ginkarawat nira an bendisyon han imperyalismo nga U.S. antes pa an eleksyon. Puruotro nga naghatag hin kaseguruhan hi Estrada nga iya igpapadayon an mga nangunguna nga palisiya ngan programa han rehimen nga Ramos. Buladas la an ginpapasamwak nga hi Estrada kuno para ha mga kablas. Ngan ha atubangan han padayon nga paggrabe han krisis ha ekonomiya ngan ha pagbalik han mga tagasunod ni Marcos ha Malakanyang, seguridad kita nga magigin mas dako pa nga pagpakuri ha katawhan Pilipino an ighahatag han reaksyunaryo nga rehimen ni Estrada.

Sugad han naglabay nga rehimen ni Ramos, an rehimen ni Estrada padayon nga nagpapatuman han neokolonyal nga palisiya han denasyunalisasyon, diregularisasyon ngan pribatisasyon nga amo an nangunguna nga rason han krisis ngan kakurian. Tungod han pagkapapet ni Estrada ha imperyalismo nga U.S. ngan ha kahakug ha dagko nga komprador ngan dagko nga agaron maytuna,

☛ padayon ha luyo nga paypay

iginpabilin ha sugad an neokolonyal nga mga palisiya ngan programa.

Ha natad pulitika, nagtikagrabe la an iba-iba nga sumpakihay ngan agway ha katilingban - tikang ha agway ha giutan han klase nga nagtitiyupi ngan gintitiyupi tubtob ha banggaay ha giutan han mga paksyon ha ranggo han mga reaksyunaryo.

An nagtitikagrabe la nga krisis ha ekonomiya, nagtutulang han pagdayon nga kangalas ngan pag-ato han katawhan. Waray pa ngani magpapaso ha lingkuranan hi Estrada, gintapo na ini hin magkadIrudilain nga protesta han katawhan nga nag-iinsister nga ipatuman an tinuod nga reporma ha tuna, pugngan an kombersyon han mga tuna, pahitas-on an sweldo han trabahador, solbaron an problema han kawaray trabaho, pahibub-on an presyo han lana ngan iba pa nga papliton, ngan damo pa nga iba.

Tungod han positibo nga resulta han ikaduha nga dakila nga kagiusan nga pagtutul-id, an Partido ngan rebolusyonaryo nga kagiusan in aada ha maupay nga pusisyon para pamunuan nga dugang pa nga isulong an pakig-away han katawhan ngan pakusgon an rebolusyonaryo nga kagiusan ngan pakig-away ha iba-iba nga nataran.

Pinakadako nga buruhaton naton ha yana an pagsustiner han mumentum han pagsulong ngan an dugang pa nga pagpapahiluag ngan pagpapakusog ha mga protesta ngan pakig-away han masa ngan dugang pa nga pagpapahiluag ngan papaparayhak han armado nga pakig-away—samtang nagpupursigi kita ha pagpapasulong han ikaduha nga dakila nga kagiusan pagtutul-id. Kinahanglan madig-on nga mapamunuan naton an haluag nga masa ha ira mga pakig-away samtang diri kita nagpapasibaya han internal nga konsolidasyon ngan pagpapakusog. Kinahanglan hugot nga mapangkatinan ini nga mga nangunguna nga buruhaton agud aktibo nga makapamuno an Partido ha presente nga sitwasyon. ★

**SURAT HAN MAMBARASA**

Mga kasama ha LARAB,

Mabuhay ngan kumusta kamo!

Nanhinaut kami nga aada kamo ha maupay nga kondisyon. Mga Bay, aadi in amon masisiring han mga Larab nga nahidadangat ngadi ha amon, natikaupay la an mga drowing ngan nasasayod gud an mga litra, ngan dako liwat nga pakabulig pagpahitaas han moral han mga kasama ngan masa.

Hinaut unta nga waray niyo pagkabutlaw, para mas pa nga mapauswag ini nga aton rebolusyonaryo nga mantalaan.

Utro mabuhay kamo ngatanan dida!

Ka. Alphen

C.E Samar

*Ka. Alphen,*

***Salamat ha imo surat.***

*Gintatalinguha namon nga magin regular an pagpadangat han Larab isyu.*

*Salamat han iyo komentaryo nga maupay na an nadangat nga mga kopya han Larab ngada ha iyo, tatalinguhaon namon nga magpadayon an sugad nga kalidad han mga isyu nga nagawas. Damo liwat nga salamat para han padayon naton nga sumpayan..*

*Sige, dinhi la anay ngan MABUHAY!*

*Larab Istap*

## MGA PANHITABO NGAN HUYOB

### RONDA HAN NPA MADINAUGON

Nakakumpiska an NPA hin usa nga M60 machine gun, lima nga M16 armalyt, duha nga kalibre 45 nga pistola, usa nga kalibre 38 nga rebolber ngan damo pa nga higamit militar han pagrondahon han Rodante Urtal Kumand, NPA yunit an PNP District Command Headquarter nga nakabase ha Brgy. Urdaneta, Lavezares, Norte han Samar hadton Hulyo 29, 1998, mga alas 12:30 han udto.

Namatay ha gapil han pwersa han reaksyonaryo nga gubyrno hira 1<sup>st</sup> Lt. Gabriel Rosales han Philippine Army, PO3 Estephan Agos ngan Generoso Forlon han PNP ngan may upat pa nga samaran. Usa an kaswalti ha gapil han rebolusyonaryo nga pwersa.


Ha ira pahayag ginlansar ini nga pagronda komo pagsirot ha nasabi nga yunit han PNP han mga reklamo han masa nga grabe nga pangurakot, pangilkil ngan pangabuso. Nagseserbi liwat ini nga pahinumdom ha hinuman nga yunit o kaapi han PNP o Philippine Army nga aktibo ha mga kontra-insurhensiya nga operasyon ngan nadadabe ha grabe nga pangabuso ha katawhan, magigin prinsipal nga target ha mga pag-atake han NPA, dugang pa han Rodante Urtal Kumand.

### PAKIGBISOG HAN MGA TRABAHADOR HA ASYENDA

Hadin naglabay nga Abril, nagkamay-ada urosa nga paggios an mga trabahador ha asyenda han katubhan ha usa nga parte han Norte Leyte. Tungod han ira katiniyupi ngan katinalumpigos han dagko nga mga agaron maytuna o mga asyendero, nagkaurosa an pira nga unyon han mga trabahador ha asyenda nga magpadangat hin petisyon ha Hilongos Sugar Milling Company (HISUMCO), usa nga dako nga nagtatag-iyha hin higluag nga katunaan han Norte Leyte. Ira igindemanda nga pahitas-an an suhol han mga trabahador ha asyenda, tikang ha 50 ngadto ha 80 ka pesos kada adlaw. Tungod han urosa nga kusog han mga trabahador ha asyenda nagin madinaugon an

ira paggios ug nakab-ot nira an ira kadaugan nga 60% nga nahidugang ha ira suhol.

Hini liwat nga naglabay nga Hulyo 7, nagpiket an baynte kwatro (24) nga trabahador han Asyenda Torres ha National Labor Reconciliation Commission (NLRC), Tacloban. Ginbuksas nira an konsabohay han NLRC ngan agaron nga hinungdan han kadiri paghatag han agaron hin 10 milyones ka pesos nga mga benepisyo ha 113 nga mga trabahador ha sakob hin duha ka . Padayon nira nga igindedemand ini. Labot la han piket, nagkamay-ada liwat hira *press release* ngan *radio hopping* ha pira nga istasyon ha Tacloban ngan Cebu.



### WELGA HAN MGA TRABAHADOR HA PNOC-EDD, MADINAUGON

Nagin madinaugon an tulo ka adlaw nga welga han mga trabahador han Energy Drilling Division han PNOC (PNOC-EDD) hadin Pebrero 1998 ha Norte Leyte. Naparalisa han maabot 70 nga trabahador nga nagwelga an operasyon ha mga estratehiko nga parte han planta. Nakab-ot nira an demanda nga "union recognition" o an pagkilala han management ha ira unyon nga National Union of Rig Workers (NURWO).

☞ *padayon ha luyo nga paypay*  
Igindaug liwat nira ha "collective bargaining agreement" o CBA ha management an P4,500

nga umento ha sweldo kada bulan nga ihahatag han management ha sakob hin tulo katuig. Ha yana, nakarawat na han mga trabahador an P2,100 nga umento ha ira binulan nga sweldo para han una nga tuig.

Waray magpahadlok an mga welgista ha igindeploy nga kompanya han regional command han AFP ngadto ha sakob han planta han PNOC. Samtang, ginsuportahan liwat an welga han mga trabahador han PNOC-EDD ha Bikol, Laguna ngan Negros pinaagi hin mga piket.

Ha yana, padayon an pakig-away han mga trabahador ha PNOC-EDD kontra han: unom ka-adlaw nga pagtrabaho ha kada semana; pribatisasyon han PNOC; ngan pagtanggap han pira nga benepisyo tungod han pagtitipid o “austerity measures” han management.

### **PAGSALIN-UROG HAN ADLAW HAN PAGTRABAHO**

Ginsalin-urog han maabot 300 nga trabahador ha Ormoc an Adlaw han Pagtrabaho hadin Mayo 1 pinaagi hin martsa-protesta kontra ha iskema han pribatisasyon ngan austerity han mga pabrika nga pananagiya han gubyrno. An mga trabahador amo in tikang ha mga unyon han National Union of Rig Workers (NURWO), Tongonan Workers Union, NAFLU-KMU, ngan Leyte A Geothermal Project Employees Association (LAGPEU).

Ginlalauman nga kumusog pa an pagkigbisog han mga trabahador ha pira nga pabrika ngan planta ha Norte Leyte kontra ha pribatisasyon. Plano han rehimen Estrada nga kumpletuhon an pribatisasyon han nahibibilin pa nga pananagiya han gubyrno nga korporasyon ngan kompaniya ha sakob han syahan nga 100 adlaw han pakalingkod hini ha poder. Direkta nga maaapektuhan hini nga larang amo an masunod nga pabrika ngan planta ha Norte Leyte: Philippine Associated Smelter and Refining Corp. (PASAR), Philippine Phosphate and Fertilizer Corp. (PHILPHOS), ngan Philippine National Oil Corp. (PNOC) nga mayda sobra 2,000 nga trabahador ha kabug-osan.

### **LIDER PARAG-UMA GINPATAY**

Ginpatay hi Roberto Inso, 55 anyos, usa nga lider parag-uma, nga nag-uukoy ha Brgy. Bagabao Leyte, Leyte Nahitabo ini hini nga Hulyo 13, alas 7:30 han gab-i ha ira mismo panimalay pinaagi han pagpusil hin shotgun. Waray pa makilal-I an naghimo hini nga krimen. Hi Inso barangay kapitan han Brgy. Bagabao ngan tsirman liwat han KUMPAS (Kusog sa Mamumuo sa Pastuhan). - organisasyon han mga parauma nga aktibo nga nakikigbisog ha mga kontra-oarag-uma nga binuhatan ni Melchor Larrazabal, usa nga despotiko nga agaron. Gintambungan an lubong hadton Hulyo 23 hin 1,760 katawo kaupod an mga representante han 11 nga organisasyon han parag-uma, trabahador ha tubuhan, ngan mga estudyante.

### **IKA-25 ANYOS NGA ANIBERSARYO HAN NDF**

Dayag nga nagselebrar an NDF han ika-25 nga anibersaryo hini hadton Abril 24 ha Bahay Kalinaw, UP Campus, Diliman, Q.C. Tema han katitirok an: “An Rebolusyon 1896, aton Sulundanon; an Pagkumpleto han Diri-Human-nga Rebolusyon, Aton Komitment”. Gintambungan ini hin 200 ka tawo upod hira Luis ngan Coni Jaladoni, pira nga ambasador, kaapi han *peace panel* ha gapil han gubyrno, mga PO, taga-masmidya, mga pamilya han mga martir han rebolusyon, mga indibidwal nga alyado ngan mga sangkay. Nagkamay-ada hin mga pamulong hi Jalandoni para ha nasering nga tema. Nagkamay-ada liwat hin paghinumdum ngan pagsaludo ha mga martir han rebolusyon pinaagi hin siday ngan kanta.

Usa pa nga dayag nga selebrasyon an ginhimo han maabot 500 nga mga kabataan-estudyante ngan mga aktibista ha Abelardo Hall, UP campus hadto manta nga adlaw. Dinhi nagyakan hi L. Jalandoni ngan S. Llamas, mga kaapi han NDF *peace panel*. Nagkamayda liwat pagpasalida han *video documentary* han NDF. Ginkanta han ngatanan an Internasyunal komo paghuman han selebrasyon.

Naglansar liwat an mga prente gerilya hin mga *memorial meeting* para ha mga martir hini nga okasyon.. Nagselebrar liwat an mga kasama ha Europa ngan Kanada. ★ .

## PANAN-AW

### AN KRISIS HA EKONOMIYA NGAN AN REHIMEN NGA ESTRADA

“Erap para sa mahirap!” ini an islogan nga agsob gamiton han bag-o nga lingkod nga rehimen Estrada para uwaton an katawhan ha tinuod nga kamutangan ngan hingaradtuan han ekonomiya.

Ginpapamatud-an la hini nga islogan nga an krisis ha ekonomiya in inabot na hin kagrabehon nga diri na kaya matahuban o maitago bisan han estado. Bisan an bag-o nga presidente in aminado ha kabug-aton han iginpasa ha iya nga problema ha ekonomiya han nauna nga rehimen Ramos.

Grabe an paghubas han kapital ngan salapi han Pilipinas. Inabot na hin 15 bilyon piso an depesito ha badyet han gubyrno ngan gintatantiya nga maabot pa ini hin 70 bilyon piso ha katapusan han tuig.

An alkanse ha langyaw nga negosyuhay in linubo ngadto ha 5.4 bilyon dolyares. Nagtitikamahal an balor han gin-iimport nga makinarya, enerhiya ngan iba pa nga ginkokonsumo ha ekonomiya. Ha luyo nga bahin, an manupaktura nga nakatuon-ha-ekport in ura-ura nga naigo han krisis han sobra nga produksyon ha kalibutan. An kita tikang ha ekpsort han mga dugnitan in linuros tikang pa han 1994, ngan han mga *semiconductor* tikang han 1996.

Samtang, an langyaw nga utang in maabot 45.43 bilyon dolyares na. Diri pa dinhi upod an papas-anon han gubyrno nga 22 bilyon dolyares nga langyaw nga utang han mga lokal nga kumpanya nga diri na kaya makagbayad.

Grabe liwat an pag-atras han langyaw nga kapital ngan puhunan tipagawas han nasud. Tungod hini, damo na nga mga negosyante an nalugi ngan nagsera hin pabrika, kun diri man, nagpaguti han ira produksyon.

Samtang an padayon nga paglinuros han balor han piso in nagtutulang pa hin mas grabe

nga destroso ha reserba nga dolyar, ha langyaw nga negosyuhay, ha obligasyon ha pagbabayad han utang ngan pag-atras han kapital tipagawas han nasud. Ha yana an balor han piso in 43 ka pesos kada dolyar na, tikang han 26 ka pesos kada dolyar hadin Hulyo 1997.

An masa han katawhan an prinsipal nga nagpapas-an ngan naabat han hapdos hini nga krisis. Tigda nga dinako an porsyento han populasyon nga nabubuhi ha hul-os nga kapobrehan.

Nagtitikagrab an kawaray pakabuhin. May sobra usa ka-milyon (1.015 milyon) na an natanggal ha trabaho tikang han 1997 ngan mayda na yana 4.278 milyones nga Pilipino an waray trabaho.

An tigda nga pagluros han balor han piso dugang nga nagpapaguti han daan na gutiay kaupay nga ginkikita han masa han katawhan. Tigda ngan padayon pa nga nag-uumento an presyo han mga batakan nga papliton ngan serbisyo. Sering han gubyrno kinahanglan na hin 417 ka pesos kada adlaw an usa nga pamilya yana para mabuhin hin disente. Pero, an minimum nga suhol han trabahador in nakaraysang la gihapon ha 195 ka pesos.

Ha luyo nga bahin, padayon ngan madagmit an akumulasyon han karikuhan ha kamot han pipira. Samwak an hiluagan nga panlulupot ngan pan-ngagaw hin tuna han mga AMT ngan dagko nga korporasyon ha tuna. An mga langyaw nga monopolyo, kumpanya ha pinansya, mga eksporter ngan importer, tag-iya han mga manupaktura nga nakatuon-ha-eksport, mga tag-iya hin dagko nga *megamall* ngan ispekulador ha *real estate* amo an nagpupulos ha libre nga awas ngan kumbertibilidad han langyaw nga salapi.

Angay itudlok nga prinsipal nga hinungdan hini nga makalilisang nga kahimtang han ekonomiya ngan grabe



nga paghihimakuri han katawhan yana, an neokolonyal nga palisiya han denasyunalisasyon, deregulasyon ngan pribatisasyon nga ginhasog han naglabay nga rehimen Ramos, subay han dikta han imperyalismo nga US.

Yana, ubos hin kahambog nga ginsasaad ni Erap Estrada nga iya tatalwason an katawhan ngan iduduso an kauswagan ha ekonomiya. Pero, tipaunano niya ini hihimuon kun padayon nga hahasugon han iya administrasyon ini nga neokolonyal nga palisiya ha ekonomiya?

Gindeklarar han rehimen Estrada nga kukompletuhon hini an pribatisasyon han nabibilin pa nga mga pananag-iya han gubyerno ha sakob han una nga 100 diyas han iya paglingkod ha poder. Sakop han mga maaapektuhan an pira nga pabrika ngan planta nga na-opereyt ha Sinirangan Bisayas sugad han PASAR, PHILPHOS ngan PNOC.

Igapadayon gihapon han rehimen Estrada an iskema han liberalisasyon ha negosyuhay. Una, hul-os niya nga huhulkason an ngatanan nga ulang ha pag-iimport hin bugas. Ha yana, an asukar, bugas, mais ngan iba pa nga produkto nga pagkaon in gin-iimport na ha tikadako nga kantidad. Ikaduha, aabrehan hini an lokal nga industriya han pinatipat nga negosyuhay (retail trade industry) ha pagsakob han langyaw nga pamumuhunan ngan tutugutan an 100% nga pananag-iya han urhi dinhi. Piho nga magreresulta ini ha mas grabe nga kalugi ngan kaperdi han unob na nga namemeligro nga lokal nga produksyon ngan negosyuhay.

Mas hugot nga seseguruhon han rehimen Estrada an pagbabayad han langyaw nga utang pinaagi han bag-o nga sistema han pagtatalaan han nasudnon nga badyet kada tuig. Ha bag-o nga sistema, daan na kakaltason an salapi nga pambayad ha interes han langyaw nga utang antes pa man isumiter, hisgutan ngan aprubahan han Kongreso an nasudnon nga badyet kada tuig. Samtang, padayon nga hahasugon han rehimen an palisiya han pagsarig ha langyaw

nga utang komo usa han nangunguna nga surok hin kapital ha pagpapadalagan han ekonomiya.

Klaro kaupay tikang hini nga an rehimen Estrada diri “para ha mga kabras”. Waray ini pagkakaiba ha rehimen Ramos ha pagigin reaksyunaryo, taga-serbi han interes han mga dagko nga komprador ngan agaron maytuna, ngan tagasunod ha dikta han imperyalista nga US.

Nagpapabilin an ekonomiya han Pilipinas nga atrasado ngan agraryo. Nahihigot ngan ginpapakurian han tikadako nga alkanse ha negosyuhay, nagpapas-an hin tagdagko nga langyaw nga utang, ginhihigot an piso ha dolyar, ginpapasagdan an langyaw nga pamumuhunan nga porpolyo ngan libre nga pag-awas han langyaw nga salapi. Samtang nagpapabilin nga bagapyudal an ekonomiya han Pilipinas, waray iba nga hingaradtuan ini kundi an pinakatangpi han umpas ngan pagkahulog ha mas hilarum pa nga paghihimakuri.

Para makahulagpos tikang ha tikagrabang krisis ha ekonomiya, kinahanglan ig-undong an nasudnon nga industriyalisasyon ngan tinuod nga reporma ha tuna. Ini an mag-uutod han kadena han paniniyupi han imperyalista nga US ngan iba pa nga monopolyo kapitalista ha nasud ngan katawhan Pilipino. Pero, diri malalauman san-o pa man an bisan hain nga rehimen nga nalingkod ha poder nga mag-undong hini.

An katalwasan aada gud la ha pagsulong ngan pagdadaug han nasudnon nga demokratiko nga rebolusyon.

Sanglit, ha atubangan han pagtikagrabang krisis ngan paghihimakuri, mas dugang nga kinahanglan nga isulong an armado nga rebolusyonaryo nga pakig-away han katawhan !★

## HA KAMATUORAN

### NAGDUDUHA HIN YAKAN AN AFP

“Nagtitikaluros an ihap han mga kaapi han NPA ha Samar”. “Istabilisado na an kamutangan paz y orden ha Samar...”. “Insurhensiya: diri na tarhog ha Sinirangan Bisayas”. Ini an pira nga mga pulong nga iginyayawyaw han mga opisyal han Philippine Army (PA) ngan PNP ha rehiyon.

Hadton Hulyo 29,1998 madinaugon nga ginronda han Rodante Urtal Kumand, NPA, Norte Samar an PNP District Command Headquarters ha Lavezares, N. Samar. Nakakumpiska ini hin


darudamo nga armas ngan iba pa nga kagamitan militar. Tulo an patay ha ira gapil ngan upat an samaran. Sering han pahayag han Rodante Urtal Kumand ginhimo nira an pagronda komo pagsirot hini nga yunit dara han damo nga reklamo han masa nga grabe nga pangurakot, pangilkil, ngan pangabuso nga ginhihimo hin pira nga mga opisyal ngan kaapi han nadadabe nga yunit han PNP. Ginsering pa nira nga hinuman nga napartisipar ha kontra-insurhensiya nga operasyon ngan nadadabe ha grabe nga pangabuso ha katawhan, magigin target han pag-atake han NPA.

Kun aton mahinunumduman, nagsunodsunod na ini nga mga opensiba han hukbo han katawhan nga nagtikang hadton Marso 1998 hinungdan nga gintulon na liwat han pasista nga militar an ira yawyaw nga nagtitikaluros ngan maluya na an NPA. Mamingaw la nga gin-akseptar han Departamento han Nasudnon nga Depensa (DND) an utro nga pagkusog han NPA ha Sinirangan Bisayas. Ginbag-o hini an palisiya nga igpasa na ha PNP ha Sinirangan Bisayas an kontra-insurhensiya nga programa. Yana, ini nga programa nagpapabilin ilarum han Philippine Army ngan an PNP ginhimo na la nga yunit pansuporta.



**PITYUR**

## PARAYHAKON AN BURUHATON PROPAGANDA !



Bag-o na naman an presidente han gubyrno ha Pilipinas. Bisan kun waray batakan nga pagbabag-o an sitwasyon, naaatubang kita hin sitwasyon ngan panginahanglan nga maglinaw ha masa ha kinaiya han bag-o nga rehimen. *“Erap para sa mahirap”* an islogan nga nagdara kan Estrada hin dako nga pagdarag-an ha eleksyon. Ngan ini nga lungag nga islogan an padayon nga iginpapasamwak ngan iginpupustura ni Pres. Estrada ha bulig han masmidya ngan mga repormista ha butnga han kamatuoran nga ginpapadayon niya an mga palisiya ngan programa han mga dati nga rehimen nga dugang nga nagpapakuri ha katawhan.

Igpipirit ini nga popularidad pinaagi hin damo la nga pamaagi. Aada in panhatag hin gudti nga pahalipay ha masa, mga palabas nga pagpuksa hin mga kriminal, pagpasyada ha mga lugar han mga kabras, paggamit hin panmasa nga lengwahe ngan istilo ngan magin paggamit hin progresibo nga mga termino. Ini ira bubuhaton para libangon ngan uwaton an katawhan ha tinuod nga mga panhitabo. Maaram liwat kita nga ini nga mga pagbabalyo hin rehimen gintutuyo han

reaksyunaryo nga klase para ulangon an boylo han mga pakig-away ngan protesta han katawhan, pakalmahon an kangaralson han katawhan, makaiwas ha mga komprontasyon, ngan hugtan an katin nira ha sitwasyon.

Ha sugad importante ngan kinahanglan nga ha gilayon maipaklaro ha katawhan an tinuod nga kinaiya han Rehimen Estrada para maagap nga mabuksas ngan maatuhan han katawhan. Angay mailinaw nga hi Estrada sugad han dati nga mga presidente ngan susunod pa nga mga presidente ha bagapyudal ngan bagakolonyal nga Pilipinas in papet *☛ sundan ha sunod nga paypay*

han imperyalismo nga US ngan tagapag-undong han interes han lokal nga naghahadi nga klase. Angay an mga rebolusyonaryo nga pwersa abtik ha pagpurot hin mga kongkreto ngan magpaso nga lokal ngan nasyunal nga mga isyu para maipakita ha katawhan an kawayay pag-ugop ngan kawayay pulos hini nga rehimen para ha ira. Pananglitan, magin pursigido kita ha pagpapahayag ha kakurian ngan kagutuman nga nahitatabo ha mga kabaryuhan ngan an kawayay ginhihimo han gubyrno ni Estrada para sulbaron ini, pagbuksas han mga kontrakatawhan nga



proyekto han dati nga gubyrno ni Ramos nga ginpapadayon tubtob yana sugad hini nga kontra parag-uma nga mga ARC, eko-turismo ngan mga *development* nga mga proyekto, minning act nga direkta nga apektado an haluag naton nga katunaan dinhi ha rehiyon, an kawaray pansosyal nga serbisyo nga naabot ha kabaryuhan, an mga isyu han mga trabahador nga kontraktuwalisasyon, habubo nga pasuhol ngan kakulang hin mga benipisyo, pagbuxsas han ibaiba nga porma hin militarisasyon ngan pan-aabuso ha mga katungod pantawo ngan iba pa nga mga nasyunal nga mga isyu sugad han Visiting Forces Agreement ngan damo pa nga iba.

Gin-aaro han sitwasyon an pagin marayhak ngan mahimuon han aton pagpopropaganda. Aada an mga nahiaran na naton nga porma nga kinahanglan la utro parayhakon ngan pauswagon sugad han panmasa nga miting, talakayan han mga grupo, pagbalaybalay nga pagpropa, pagpapasundayag hin mga kultural nga presentasyon sugad hin luwa, kanta, iskit, drama, interpretasyon-nga-sayaw, distribusyon han pahayagan panmasa, polyeto, pagpipintura hin mga islogan ngan iba pa. Poyde nga makabulig an aton LARAB ngan iba pa nga nahipapaabot nga mga nasyunal ngan internasyunal nga mga pahayagan komo mapagkukuhaan hin mga datos ngan impormasyon mahitungod ha pira nga magpaso nga isyu ngan/o hin pan arte ngan literatura nga parte. Pero syempre, yawe an pansosyal nga imbestigasyon ha lugar nga ginigiosan para han wasto ngan haum nga mga isyu ngan para napapartikularisa ngan napapaundan an mga panrehiyonal ngan/o pan-nasyunal nga mga isyu.

Importante liwat nga punto ha pagpaparayhak han aton buruhaton propaganda amo an pagbuhi han partisipasyon ngan pagpapagios ha masa. Magigin epektibo gudla an aton propaganda kun ini nagpapahamtang han tinuod nira nga kahimtang ngan kun ini iginpapahayag ha ira lengwahe ngan mga pamaagi.

An panginahanglan para ha marayhak ngan haluagan nga buruhaton propaganda diri la ha katuyuanan han presente nga buruhaton nga pagbubuxsas ha kinaiya han rehimen Estrada kundi usa ini nga pankabug-osan nga panawagan. Importante nga pirme kita pukaw han panginahanglan ngan importansya hini nga buruhaton nga: Pinaagi ha buruhaton propaganda naabot naton an hiluag nga masa – organisado man o diri – para ipahayag, klaruhon ngan buhion an mga rebolusyonaryo nga pag-analisar, katuyuanan ngan buruhaton ha kada panahon, balitang ngan lugar. Ha sugad ginbubug-os naton an hunahuna, kasingkasing ngan paggios han masa.

Ini nga buruhaton diri la ginhihimo han pira nga mga espesyalista. Ginhihimo ini han kada kaapi han Partido ngan mga aktibista han rebolusyon ha kada higayon. Ginbabaton han buruhaton propaganda an pagbuxsas han mga kaaway han rebolusyon ngan gin-aatuhan an ira mga larang kontra ha katawhan ngan rebolusyon ngan Partido, paglinaw han linya, programa ngan palisiya ngan mga pamaagi han rebolusyonaryo nga paggios ngan mailadawan an kinabuhi ngan mga pakig-away han masa ha usa nga pamaagi nga nailaladawan an ira pagkamabayanihon, pagkagamhanan ngan pagkarebolusyonaryo.

★

LITERATURA NGAN ARTE

(Usa nga Kanta)

AN IROY NGA TUNA

(1)

*An iroy nga tuna makuri an kahimtang*

*Bisan diin kadto puros kakurian*

*Inin mga pobres nga tinalumpigos*

*Parag-uma, trabahador ngan gudti nga riko*

(11)

*Inin Pilipinas permi la uripon*

*Tempo han Espanyol Hapon Amerikanhon*

*Mga kakurian diri mapupugngan*

*Kun diri mag-urosa kita an katawhan*

(111)

*Di kita mahadlok, di kita malisang*

*Ha pag-organisa han masa pag-ugop*

*Ay tiunay, basuni, inaabat*

*An hapdos makuri*

(1V)

*Diri ta na mailob mga kabugtuan*

*Inin kakurian nga gin-aagian*

*Kay maabot an takna nga aton talaan*

*Masa an magmamando han panggubyernohan.*

**(Utruhon) ★**

## GINRONDA HAN NPA AN 1<sup>ST</sup> PROVINCIAL HEADQUARTER han PNP

Gin-aako han Rodente Urtal Kumand an responsibilidad ha ginhimo nga madinaugon nga pagronda ha 1<sup>st</sup> Police Provincail Mobile Group o PNP District Command Headquarter nga nakabase ha Brgy. Urdaneta, Lavezares, Norte han Samar hadton Hulyo 29, 1998, mga las 12:30 han udto ngan kadungan hini an pag-ambus ha pira nga elemento han Phil. Army nga sakay han pan-army nga sasakyan han pag-agi hini ha blocking force didto manta nga lugar. Kahuman han 25 minutos nga agway, nakumpiska han NPA an usa nga M60 machine gun, lima nga M16 armalayt, duha nga M14, duha nga kalibre 45 nga pistola, usa nga kalibre 38 nga rebolber ngan damo pa nga mga higamit militar.

Napatay ha gapil han mga pwersa han reaksyunaryo nga gubyerno hira 1Lt. Gabriel Rosales han Phil. Army, PO3 Estephen Agos ngan Generoso Forlon han PNP ngan may upat nga samaran. Usa ha gapil han NPA an napatay. Nagdamo an kaswalti ha gapil han PNP dara han ginhimo hini nga nahugot nga pag-ato luyo han pagtalinguha han NPA nga mahimo an mamingaw nga pagdis-arma ngan pagpasurender ha ira.

Ginhimo ini nga pagronda komo pagsirot han nasabi nga yunit dara han kadamo nga reklamo han masa ha grabe nga pangungurakot, pangilkil ngan pangabuso nga ginhihimo han pira nga opisyal ngan kaapi hini nga yunit.

Sugad man ini nga pagronda nagseserbi liwat ini nga pahimatngon ha PNP ha pagpartisipar nira ha kontra-insurhensya nga operasyon ha pagpuypoy ha NPA. Pahinumdom ini nga anuman nga yunit o indibidwal nga kaapi han PNP ngan Philippine Army nga naaktibar ha kontra-insurhensya nga operasyon nga nadadabe ha grabe nga pangabuso ngan pangurakot ha katawhan, magigigin prinsipal nga target ha mga pag-atake han NPA.

Ini nga madinaugon nga pagronda han NPA nagpapakita la ha kamatuoran ngan an NPA ug an rebolusyonaryo ng kagiusan padayon na nga nagkukusog ngan nakakabawi na resulta han iginlansar hini nga kagiusan pagtutul-id ngan ha mahugot nga pagsuporta han katawhan ha armado nga pakig-away para matukod an usa nga sosyedad nga talwas, murayaw ngan mauswag.

Ka. Amado Pesante  
Rodante Urtal Kumand  
New People's Army  
Norte han Samar